

HAUS BAGARAP, HEVI KAMAP

Krai bilong ol pipol bihain taim lo haus bruk na Paga Hill kominiti (man na meri) tu bruk na igo stap wan wan. Wanpla bung ripot we Aid/Watch Australia, Jubilee Australia Research Centre na ol membass bilong Paga Hill Kominiti ol wokim.



EKSEKETIV SAMARI

Insait lo Pot Mosbi, Papua Niu Gini, mak bilong 3,000 pipol stap gut tru wantaim bel isi lon Paga Hill, ples em gutpla tru na san igo daun save luk nais tumas olsem piksa arere lo solwara.

Lo yia 2012, Paga Hill em wanpla fit Kominiti we save igo pas yet lo ol narapela.

Ol pipol stap pinis lo hap abrusim namba fo (4) genere-sen, insait lo pemenent na hap-pemenent haus we ol yet wokim lo han blo ol.

Ol pipol save lukautim ol yet igo ikam: ol kamap olsem femili tru tru.

Ol pipol planim frut na hebs marasin, na ol save igo painim fis lo solwara.

Wanbel pasin istap lo laip bilong ol, ol save kaikai gut, na ol pikinini bilong ol isave go lo skul.

Ol displa pipol wok bung na wok hat tru lo kamapim gutpla sindaun lo kominiti, stat lo namel blo 1960s na kam antap.

Ol yet karim pawa na wara ikam, mekim kominiti priskul na haus lotu, na ol divolopim law na oda kominiti.

Ol kominiti save bungim moni na givim papa graun, na kominiti membass ol kisim tok orait lo papa graun lo kamap wasman blo twenti pela (20) sement haus we ol soldia save yusim lo Wel Wo Tu (WW2) taim na displa ol sement haus stap nambaut nambaut antap lo Paga Hill. Displa Kominiti igat nem olsem wanpla seif setol-men insait lo Pot Mosbi. Tasol lo yia 2012 olgeta samtin bai senis olgeta, wantaim haus bruk na fos eviksen blo rausim man na meri lo kominiti.

Ples we kominiti na hauslain stap lo em bifo, gavaman em makim pinis olsem displa ples em nesinol pak, tasol Paga Hill Development Company (PHDC) em putim ai na mangal tru. PHDC, kampani ol rejistarim pinis insait lo PNG igat strongpla koneksen wantaim Australia, ol kisim hap graun lo rentim tasol igat liklik asua we wanpla PNG palamen komiti emi wok painim aut olsem Mama Lo blo kantri em ino tok orait. PHDC emi plen gut lo wokim Paga Hill Estate, wanpla divolopmen we winim tru ol narapla na bai kostim tri (3) billion Kina (antap lo AUD\$1.3 bilion) em bai divolopim ples, senisim lukluk na filins blo kepitul citi, na tu ol laik wokim risot (resort), kasino (casino), akuarium (aquarium), wo museum (war museum) na kalsa na eksibisen senta (culture and exhibition centre).

Lo namel lo kot betol lo rausim kominiti, wanpla bifo hap graun blo paga hill we ol ino makim lo em ol ibin makim, rejistarim na kampani kisim, papa blo kampani em paga hill developmen kampani. Lo wankain taim NCDC em wok stron lo wanpla projek lo wokim rin rot (ring road) lo as blo paga hill stret.

Namel lo 2012 na 2014, displa olgeta hauslain na kominiti namba mak olsem 3,000 man na meri ol ibin fos na rausim ol lo haus blo ol. Kominiti membas polis ibin paitim ol, poretim ol wantaim gan lo rausim haus kam daun, na ol hat lo kisim ol samtin blo ol insait lo haus. Haus blo ol pipol, ol samtin na propeti blo ol isave wokim moni lo em, olgeta samtin dosa brukim na fletim igo insait lo graun lo mekim rot blo Paga Hill Kampani.

Displa tupla mein demolisen na Eviksen, insait lo mun Mei 2012 na mun Julai 2014, ol polis iwokim displa hap wok na iluk olsem NCDC em oganaism o plenim, displa ensa em ikamap bihain lo PHDC askim na kisim kot oda pepa. Tupla demolisen ibin kamap pinis taim kominiti fait lo kot lo stopim kot oda pepa blo kampani (PHDC).

Keten Bros Papua Niu Gini Ltd (Curtain Bros Papua New Guinea Ltd) em wanpla kampani ol rejistarim lo PNG na em igat koneksen wantaim Australia, NCDC em givim wok lo Keten Bros lo wokim rin rot igo antap lo kominiti ol demolisim lo em, Keten Bros tu em helpim lo painim niupla ples blo ol Paga Hill pipol lo wanpla ples ol kolim Gerehu bihain lo namba tu demolisen na Eviksen insait lo mun Julai 2014.

Bihain stret lo Paga Hill kominiti ibin bruk olgeta, ol man na meri tu bruk igo stap nambaut-nambaut lo narapla hap ples, kain olsem Gerehu na Six Mile, tupla difren lokesen istap autsait na lon we lo Pot Mosbi.

Displa ripot em wok painim aut wanem kamap lo pipol blo Paga Hill, na ripot lo laif blo ol pipol hau ol istap insait lo Six Mile setolmen, lo Gerehu, lo rot or strit na insait lo narapla ol setolmen nambaut we istap insait na autsait lo Pot Mosbi.

Paga Hill Development Company (PHDC) ibin tok olsem ol bai helpim pipol blo Paga Hill lo kisim graun taitol, wantaim pawa na wara, lo wanpla hap lo Six Mile, em wanpla setolmen we istap olsem 10 kilomita autsait lo Pot Mosbi. Klostu lo 400 pipol igo stap lo displa hap tasol helpim blo ol em ino inap, ples ya bihain ol kolim "Tagua". Ananit lo lukaut blo Paga Hill Development Company, ples ya nogat hap lo kisim wara, pawa, na rait ples blo tolet.

Lo taim blo raitim displa ripot, ol pipol blo Tagua, Six Mile, igat wanpla wara tap tasol wok. Ol nogat pawa o rait ples blo tolet, na planti pipol livim laif blo ol stap ananit yet lo kenves haus we ol bruk stap bikos ol yusim planti yia go pinis. Ol inogat graun pepa o taitol na stil stap wantaim poret tintin blo eviksen.

Kominiti membas tok National Capital District Commission ibin tok membas blo Paga Hill kominiti bai kisim

graun taitol, wara saplai na pawa antap lo wanpla hap graun stap fri lo em we istap beksait lo Gerehu, wanpla hap ples we 50,000 plas man na meri stap lo em na ples ya istap olsem 16 kilomita lon we lo Paga Hill.

Klostu mark lo 600 pipol ol muvim go lo displa ples graun stap fri lo em, displa ples em ol Paga Hill lain kolim "8th Strit" (eight street). Kominiti membas tok Curtain Bros Ltd karim ol go lo kar blo ol, wantaim hap diwai na kapa blo haus blo ol, planti haus em hap bagarap o em bagarap olgeta. Haus lain ol givim ol K1,000 (klostu moni mak \$AUD452), lo baim nil blo wokim haus.

Taim displa ripot ol raitim stap, lo 8th Strit, Gerehu, ol NCDC ino kisim pawa igo insait. Liklik lain tasol lo kominiti yusim sola pawa, na ol pipol yet brukim graun na wokim ples blo tolet. Ples blo kisim wara em stap lon wei. Wanpla wara tep tasol em stap lo kominiti istap klostu tasol ol kolim "Stage 7", na tupla kominiti wantem save skelim wara. Wan-wan taim ol man kisim wara, displa em save kamap 2 o 3 pla taim lo wanpla dei, ol mas baim K2 o K3 igo lo man was lo wara, na karim hevi kontena lo displa longpla rot. Displa pasin tasol wokim na planti pipol kisim sik beksait pen na bruk. Pipol usait stap lo 8th Strit, Gerehu nogat graun pepa o graun taitol na ol bai kisim hevi blo eviksen eni taim lo laif blo ol.

Kominiti membas tok klostu mak olsem 2,000 pipol blo bipo kominiti ol stap lo Pot Mosbi strit, stap wantaim anti, ankol, na femili, ol igo bek lo as ples na provins blo ol, ol painim narapla ples na haus lo stap, ol stap nambaut-nambaut insait lo PNG, o sore tru olsem planti dai go pinis. Kominiti membas tok bikpla hap namba blo displa lain ino kisim gutpla sapot.

Displa em fest pla wok painim aut (stadi) we displa stadi emi traim lo painim aut gut ol bikpla bagarap isave kamap lo taim blo demolisen (Haus bako brukim) antap lo olgeta kominiti insait lo Pot Mosbi. Displa infomesen mipla kisim emi tokaut lo difren taip blo hevi ol pipol filim insait lo PNG, bikos planti fos evikson ikamap pinis insait lo 10 pela yia igo pinis.

Mipla askim 190 pipol lo painim aut lo laif au ol stap bihain lo demolisen blo Paga Hill. 15 pla pipol ol livim laif blo ol lo Six Mile; 112 ol stap lo 8th Strit, Gerehu; 31 ol nogat haus na livim laif blo ol lo strit; na 32 pipol ol stap lo narapla ol setolmen na stap nambaut-nambaut insait na autsait lo Pot Mosbi.

KI WOK PAINIM AUT

Mipla painim aut olsem 190 pipol mipla askim, nogat wanpla emi ekspiriansim seim hamamas ol kisim lo besik nids na raits ol igat lo Paga Hill.

Taim pipol stap lo Paga Hill, antap lo 96% pesen blo pipol mipla askim tok olsem ol igat; haus, sikiriti, wara, pawa, haus sik, skul blo pikinini na yangpla man-meri, haus lotu, na gutpla balens kaikai.



"Paga em hauslain blo mi na em gutpela ples lo stap. Mipla stap olsem bikpla femili. Mipla igat wanpla haf-pemenent haus, igat klin wara stap klostu, mi save kaikai helti na fres wan lo solwara wantaim sampla gaden kaikai. Mipla yusim sola lait. Pasin bilong salim solwara pis lo maket emi helpim mi lo baim ol liklik samtin mi nidim, ples Paga Hill em seif na mipla igo ikam wantaim fridom."
 - Cameron, 30 pla-krismas

Bihain lo pipol ol stap nambaut nambaut, wanpla besik nid planti man na meri ol mitim insait lo displa wok painim aut em haus (79% pesen blo pipol ol askim pinis itok) na besik nid blo haus lotu (80% pesen).

Skelim difren pesentes, mak blo:

- 5% pesen blo pipol mipla askim filim olsem ol stap seif;
- 6% pesen blo pipol mipla askim filim olsem ol igat skel ples blo tolet;
- 11% pesen blo pipol mipla askim igat ples blo kisim pawas; na
- 37% pesen filim olsem ol igat ples blo kisim wara.

Olgeta pipol mipla askim pinis ol tintin planti tumas lo sait blo sikiriti (96% pesen), ples blo tolet (95% pesen) na ples haus sik na marasin (94% pesen).

Planti pipol mipla askim em ol tintin planti tumas lo wanem ol inogat stret wara na pawas. Planti pipol igat tintin hevi lo liklik kros fait na seifti, nogat sikiriti na em ino seif tu lo ol meri. Ol narapla ol tintin tumas lo sait blo wokim moni, na hap we pikinini blo ol iken go lo skul.

48% pesen blo olgeta man na meri insait lo displa wok painim aut ol tok femili membas o gutpla fren usait we bifo istap wantaim ol lo Paga Hill dai igo pinis taim fest pla demolisen blo Paga Hill ikamap lo yia 2012.

25% pesen blo olgeta pipol mipla askim stret oli sutim tok olsem bikos lo demolisen, eviksen na pasin blo surukim pipol igo narapla ples emi wokim na femili membas o frens blo ol dai. Planti tintin na wari tumas wokim na sampla pipol ol igo daun, sik man na meri na lapun painim hat tru lo lukautim ol yet taim

hevi kamap. Sampla pipol toktok tu lo femili membas blo ol usait ibin bungim birua na ol man kilim.

64% pesen blo olgeta pipol mipla askim ol igat stronpla bel tintin olsem ol bai kisim displa hevi blo eviksen narapla taim ken.

Ol United Nations komiti blo iekonomik, sosol na kalsa raits (United Nations Committee on Economic, Social and Cultural Rights) painim minin blo 'fos eviksen' olsem 'pemenent o temporeri pasin blo fos wan rausim femili na kominiti lo haus blo ol o graun ol stap lo em, wantaim nogat gutpla luksave blo kisim law sapot o ol narapla proteksen.

PNG em sain na stap ananit pinis lo Intanesinol Law ol kolim Iekonomik, Sosol, na Kalsa Raits. UN Komiti blo Iekonomik, Sosol, na Kalsa Raits em putim mo ples klia displa hap wok we ananit lo Intanesinol Law, olgeta kantri usait ol ibin sainim mas promotim rait blo hausing yusim 'olgeta stretpla rot', na tu senisim law na mekim law blo kantri wok stron, igo stret na rispektim displa Intanesinol Law. Displa em inkludim stretpla kompensesen mas igo lo pipol usait kisim hevi lo eviksen odas, displa law o sapot ol kantri mas wok hat na mekim law imas wok stron.

Lo keis blo Paga Hill, displa ol samtin ino ibin kamap.

Ikam nau tudei, displa Paga Hill Estate ol ino mekim yet wanpla samtin. Paga Hill em wanpla hap we nau inogat laif antap: diwai, maunten, gaden na hauslain olgeta masin sigarapim go pinis, ston natin stap olsem yet na planti yia go pinis nau.

Ol pipol blo Paga Hill ino kisim gut kompensesen o wari pei lo haus blo ol bruk, ol displa haus ya em ol yet wokim; ol samtin we ol save wokim moni lo em, ol liklik samtin lo haus, wantaim sia, tebol na bet blo slip, bot, TV, tosta, aien blo klos, pawas stov na komputa; na tu lo bagarapim raits na laif blo ol man na meri.

Nogat graun pepa o taitol, displa ol man na meri, na olgeta pipol insait lo PNG, ol ken bungim eviksen, olgeta taim insait lo laif blo ol. Man na meri ol feisim wanpla hevi we ol bai nogat seif haus o kominiti insait lo laif taim blo ol.

Ol pipol blo Paga Hill laik lukim luksave blo ol besic sevis mas kamap, kot mas ron lo trupla rot na wari pei o kompensesen mas kamap, blo wokim gen haus na blo statim niupla kominiti.

Taim mipla askim hau laif na stap blo man na meri ken ikamap gutpla, displa bikpla namba blo pipol mipla askim, 62% pesen, laikim ekse lo besic sevis olsem wara na **pawa. 33% pesen blo pipol mipla askim laik "lukim jastis" na ol mas kisim kompensesen (wari pei), na 27% pesen laikim trupla graun pepa: ol lain lo Paga Hill laikim graun taitol blo ol yet so ol bai filim seif.**

Narapla 15% pesen blo pipol mipla askim laikim kominiti blo ol mas stap seif na 8% pesen blo pipol mipla askim laikim usait ol lain o kampani as trabol blo brukim haus blo ol Paga Hill pipol mas wokim haus gen.

Displa stori blo Paga Hill em impoten, bikos em pat blo wanpla bikpla stori tru we planti man na meri insait lo Papua Niu Gini save feisim hevi blo eviksen kamap lo setolmen, o feisim poret blo eviksen lo mekim wei blo niupla divolopmen blo rot, bris, haus sik na ol narapla samtin.

Ful list blo skul toktok o tintin blo mipla yu iken lukim insait lo displa ripot. Displa em inkludim tintin blo mipla olsem PNG gavaman mas senisim Mama Law na Polisi lo mekim isi so law blo yumi mas wankain o igo ananit lo UN Intanesinol Law PNG sainim pinis, na impoten samtin em lo rausim, senisim o mekim law we ino save wok imas wok stron tru insait lo kantri na wankain ananit lo Intanesinol Law.

Tasol, nau nau yet, mipla bungim displa ol tintin lo helpim kominiti blo Paga Hill wantaim ol liklik samtin ol nidim.

Ligol rait lo lukautim graun (Taitol)

Mipla givim tintin olsem NCDC, wantaim Lands Dipatmen, lo wok bung wantaim Papa graun, lo hariap givim Ligol rait lo lukautim wan-wan hap graun lo wan-wan femili usait kam lo Paga Hill na stap lo 8th Strit, Gerehu. Mipla givim tintin olsem displa samtin mas kamap namel lo 12 mun behain lo displa ripot ol pablisim o rausim lo pablik.

Mipla givim tintin olsem wok blo makim graun mas stat lo Tagua, Six Mail na Ligol rait lo lukautim graun mas givim lo wan-wan hauslain blo Paga Hill. Mipla givim tintin olsem displa samtin mas kamap namel lo

12 mun behain lo displa ripot ol pablisim o rausim lo pablik.

Infrastraksa

Mipla givim tintin olsem NCDC, wok bung wantaim kominiti, hariap kisim sampla devolopmen olsem wara, pawa, tolet, na givim gut mentenens (fixim) sapot lo 8th Strit, Gerehu, na kamapim infrastraksa blo tolet system, mekim gut (impruvim) infrastraksa stap pinis lo em so ol ken kisim wara lo Tagua, Six Mail. Displa ol samtin mas kamap lo graun hariap wan na ol mas pinisim projek taim Disemba 2020 ikamap.

Mipla givim tintin olsem Paga Hill Divolopmen Kampani (PHDC) na NCDC bungim moni na NCDC bai lukautim na mekim isi lo impruvim impoten infrastraksa lo Tagua, Six Mail.

Helpim displa bruk kominiti istap nambaut-nambaut

Mipla givim tintin olsem NCDC mas makim na givim graun wantaim graun pepa o taitol na besik gavman sevis lo 8th Strit, Gerehu, o lo narapla ples graun, as tintin em lo givim Paga Hill Kominiti usait ibin bruk na stap nambaut lo Pot Mosbi.

Kompensesen

Mipla givim tintin olsem NCDC na PHDC mas givim stret kompensesen (wari pei) lo olgeta hauslain stap bifo lo Paga Hill usait igat haf-pemenent haus na pemenent haus na ol samtin blo wokim moni blo ol we ibagarap. Mipla givim tintin olsem Curtain Brothers mas yusim stron na save blo em na imas helpim na mekim displa tintin na wok igo isi tru.

Tintin igo lo Gavman blo Papua Niu Gini

Mipla givim tintin igo lo Gavaman blo Papua Niu Gini lo wok stron na mekim NCDC imas gat wanpla bel lo luksave lo tintin mipla wokim na putim antap.

Raits blo Man na Meri na Pasin blo Lukautim

Mipla givim tintin olsem Curtain Bros mas divolopim na implimentim raits blo man na meri na pasin blo lukautim (law) blo bihain taim ol projek blo em, na lo eye blo pablic em mas tokaut olsem ol (Curtain Bros) bai bihainim ol displa law.

Mipla sapotim Human Rights Law Centre lo tintin blo em olsem Australia gavaman mas impruv lo asua blo em, putim was na winim kot lo Australia blo ol kominiti usait kisim bagarap lo han blo ol Australia kampani we ol wok insait lo narapla kantri, na introdusim stronpla law blo humen raits na envaironmen raits na law blo luksave (kompensesen) bifo divolopmen ikamap ananit lo law blo ol bikpla Australia kampani na ol kampani wok lo ples o lokesen we pipol iken kisim bagarap hariap.